

豫章叢書

第三七冊

宋宗伯徐清正公存稿卷三

豐城徐鹿卿撰

表

三月以磨勘轉承議郎夏四月到任謝表

伏以投閒雲壑空懷畎畝之忠錫命天庭忽冒麾符
之寄縮五六年而成近次越三百里而爲便家被上
旨以促行進邦民而布令臣某申謝伏念臣某資材
愚下學術空疎忝竊甲科初乏洋洋之對驅馳外服
了無赫赫之名屬端平更化之初察小吏勤身之故
過推邑最獲玷朝紳一從陞列院之班再轉備西樞

之屬衆論已疑其超躡宰司更預于謀謨感造化之
曲成恨涓埃之莫報嘗因登對冒貢狂愚聖度有容
頗是齊賢之四說他人不省過尤蘇軾之多言荷泰
道之包荒領祠官而遠引丹心日皎榮念灰寒敢圖
寸朽之不遺特許方城之自效載瞻封域實介江閩
疇昔瘡痍未加鍼砭祗今疥癬復費爬搔正憂疆場
之多虞可使蕭牆之易動況利盡而忍加挾摘兼楮
輕而無策稱提共知局面之難扶安得盤根之立剖
自慚庸謏誤入選掄茲蓋伏遇皇帝陛下坤轉乾旋
海涵春育兼收並蓄無材不入于甄陶一視同仁雖

遠亦如于畿甸厚根本之培植閔田里之歎愁謂臣
近在鄉關必稍諸于土俗知臣奮由寒峻或粗達于
人情乃棄短而取長俾承流而宣化臣敢不俯殫驚
力仰答鴻私憑仗國靈弭渤海帶刀之習奉承詔旨
慰山東扶杖之思勉求一分之寬以蘇千里之急

十一月視印于南康境上閏十二月到司謝表
近日長安甫祝釐而西去觀風江潯誤將指以東來
循牆莫遂於懇祈入境具宣於寬大俯慚忝竊仰戴
生成伏念臣空抱古心豈堪世用少遊場屋志一第
以爲榮壯踐仕塗蔑寸功之自見當路過爲之汲引

明時曲示於收羅由凋邑以登朝起祠庭而予郡固未嘗違道干譽亦不敢因公病私偶無得罪於軍民安有隨車之老稚殆饑渴易爲於飲食非涓埃可益於海山人玷郡闡躡陞省闕上恩深厚但知空臆以盡言世論嶮巇必欲索瘢而洗垢絲毫無補天日臨之置散投閒正尋盟于鷗鷺取長捨短忽促駕於駟騶固辭非所以效忠冒進又幾於鮮恥莫回淵聽祇拜溫綸饑歉頻年曷給馬牛之運流離滿野孰安鴻雁之居曾是么麼可供任使茲蓋伏遇皇帝陛下與人而不求備嘉善而矜不能念臣意在愛君忍終加

於棄絕察臣才非經世尙粗竭於拙勤畀以皇華責
其後效臣敢不盡忱體國悉力爲民一江數千里風
寒諒書生之何補九州四十三屬邑庶濬澤之周流
冬十月甲戌到任謝表

非才護漕職有愧于兼三改命詳刑恩許令於共二
仍通班于中秘示增重於外臺祇拜寵光首宣寬大
臣某伏念臣孤踪寒遠質陋迂疎文不足以爲國之
華勇不足以敵王所愾其言皆平平之策非過激而
難行所至無赫赫之名期相安于弗擾比司飛輓適
值饑荒芻莫能求祇負距心之罪廩微可發空懷汲

黯之忠況復攝官尤虞非據軍旅之事未之學也自
顧何裨錐刀之末將盡爭之信非得已猶念公家之
久置恪遵渙汗而不移雖租寬於一分常懼盈于百
謫安能鞭算徒有管窺必先足正額之鹽乃可通浮
鹽之運果能禁上流之稅亦何害免稅之征欲求幹
旋通變之方當識本末重輕之理方籲天而丐免忽
易地以周諏由漕而刑均號觀風之選自江入浙益
增近日之榮茲蓋伏遇皇帝陛下無求備于一夫每
哀矜于庶幾謂毫芒析利毋庸責效于書生而圖圖
未空姑俾盡心于臬事失之於前者將收之於後尺

有所短者或寸有所長察構櫨栞栢之殊施忍毛髮
粟絲之輕棄臣敢不仰承欽恤俯念側成山嶽震搖
可但令行于屬部乾坤生育終期德洽于民心

戊午賜御書味書閣遺安堂六大字謝表

書帷夕說閱日未幾易晝芒寒自天有隕神筆一施
于潤澤御茅倍長于聲光自盡駭于榮觀手不知其
自舞臣某惶懼惶懼頓首頓首臣恭以我宋淵微之
家學每因暇日游戲于法書有如私室之扁題尤示
聖恩之優異或野處賁詞臣之第或茂功旌勛舊之
門藏在名山具存彝典厯敷西江之盛事於昭列聖

之宸奎太祖表洪氏之義居光堯書萬里之齋額然
名德乃膺是眷豈么微可擬其倫伏念臣少也多奇
長而無述短檠二尺妄窺往聖之微言破屋數間近
守先臣之故址苟焉葺理予以藏修讀書之眼已昏
負郭之田何有謂學問求放心而已而貧賤庸玉女
于成得一善則服膺食知其味恐多財而益疾獨遺
之安英華自咀于窮年夢寐不忘于清夜淡而弗厭
樂以忘憂此微臣飭己之私亦古者刑家之意輒因
閑燕乞假寵靈方虞鈇鉞之誅忽委琳瑯之賜色齊
南斗奪星軫之光芒勢聳乾龍煥雨廉之晶彩增盤

谷山泉之重貫豐城干莫之精陽和不擇地而施海
宇舉聞風而起茲蓋伏遇皇帝陛下道包萬象天縱
多能心上經綸本廣廈細瓊之論毫端造化回冰崖
雪屋之春凡陪虎觀之清遊隨探驪珠而必獲察臣
研精磨鏡之帖憐臣嘗躬耕隴之勞爰頒肆筆之書
下飾窮山之陋臣敢不祇承帝賜仰對天章六字寶
傳與六經而俱壽百金產薄期百世以流芳永垂訓
于子孫庶酬恩于君父

五日到任除右文殿脩撰知平江府兼淮浙發
運副使謝表

伏以班著罔功已斷驅馳之夢麾輶假寵躡升論譔之聯荷帝力之無私感臣生之易老俟臨封境祇布寬條臣申謝竊以行都歷百年以來扶風爲三輔之勝內拱京邑固根本以爲先外餉長淮峙糗糧而尤急實爲表裏之重寄必得文武之兼才伏念臣寡過未能早衰多病曾微片善可爲蠅木之容徒有樸忠願效采芹之獻過逢盛際親簡睿知密司省闕之彌綸進侍細氈之講論而臣才非穎脫識陋管窺大不足以及扶植紀綱小不足以變通財計要其本意惟曰弗欺未殫螻蟻之忱俄嬰狗馬之疾祈聞累疏誤渥

自天廣內凝嚴除職密聯于書殿吳門咫尺勉行昭
布於奎宸生蒼顏白髮之光煥畫戟清香之色是非
常制允爲殊恩祈鎮撫之無難且轉輸之未絕必民
與官樂爲市乃不孤招糴之名必州視縣如一家乃
克全厚下之實惟寬足以革暴惟靜足以弭紛退慙
謏能曷稱隆委茲蓋恭遇皇帝陛下陶成庶類器使
羣工知臣薦試外庸熟田里艱難之務謂臣曾汚中
禁識冤旒憂顧之心責以新榮責之後效臣敢不俯
殫精力仰答鴻私黃霸務在安民誓將自託汲黯不
能任郡終願歸休

戊申磨勘轉朝散大夫謝表

輔郡承流慚罔功于下考銓曹會課誤增秩于中行
僥踰六品之陞優渥九重之賜祇膺渙汗稟極臨淵
中謝伏念臣徒守孤忠會微顯績日塵班綴病軀久
倦於驅馳恩畀麾輶詔旨弗容於避免蒙濶于京師
九重之地繫心於吳門咫尺之天每畢力以支持僅
與民而安靜抗疏累祈于閒散予環賜被於褒嘉十
一等爲大夫開唐戟戶二千石有治效忝漢璽書揆
積歲以奚勞迺逢辰而加寵茲蓋伏遇皇帝陛下規
恢庶政磨勵羣工獨總權綱內外任分於種蠡公行

信賞循良庶得於龔黃綬長每務于甄收綿薄亦叨
于明陟臣敢不誓堅素履虔答鴻私名器不假人欲
辭榮而未遂謀猷則告后雖歸老以無忘

供兵部侍郎職謝表

伏以輶居出守已愧罔功禁藁論兵忽叨謨渥宜退
而進荷寵若驚中謝竊惟歷代之建官莫重六曹之
分職屬時立武尤急司戎調補簡稽總尺籍伍符之
衆論思獻納扈屬車華蓋之間必得通才始堪妙選
如臣者地寒無挾材竊非長人之有善心好之庶幾
寡過少不如人今老矣自揆何能三載巖栖寸心灰

冷值改調于化瑟乃首被于招旌由省闈而陞列卿
侍經帷而攝銓選簡知深厚報稱蔑聞疾久苦於采
薪符遽膺於分竹強顏扶憊累疏投閒望之非雅意
於本朝汲黯自不任於治郡子環屬爾簪筆隨之禮
方謹於循牆召弗容於俟駕神武之德廣運固上稟
於明謨軍旅之事未聞終難勝於任責或者攸司之
清簡正昭大度之優容茲蓋伏遇皇帝陛下剛健乘
時威靈及物修車備器將恢內修外攘之功連茹拔
茅聿致小往大來之慶故雖不閑司馬之法亦許攝
登祈父之聯臣敢不興起懦衷對揚休命知軍容萬

里歎有忝於儒生舞干羽兩階庶助成于聖化

供禮部侍郎職謝表

伏以典三有命許汙法從之班共二非才更忝成均
之寄承恩激烈揣分凌兢竊嘗考有虞載籍之傳迺
盛帝疇咨之意以禮化最關於治本故選掄特重於
他官伯作秩宗所以重寅清之任夔教胄子所以隆
溫栗之風苟非其人曷稱茲舉如臣者受才不穎涉
世多艱早嘗備省闕之彌綸晚乃侍金華之講論寸
長蔑有一念不欺久病支離僅固筋骸之束故書忘
廢始知口耳之非守藩屢丐於歸休造闕莫違於威

命吹竽戎部疊組儒官涓埃何補於高深負乘祇慚
於玩愒周官六卿分職率屬均參禁密之司禮儀三
百待人後行益峻清華之職寵踰其分人謂斯何茲
蓋伏遇皇帝陛下器使羣工手提妙造地蟠天際儀
文昭煥於兩閒魚躍鳶飛德化陶成於萬有不求其
備善用其中謂臣粗謹司存姑俾攝承於邦典知臣
斷無他技或能勉率於諸生是使妄庸亦叨簡記臣
敢不對揚殊渥激勵壯懷屬車華蓋之閒誓樸忠之
自効稽古禮文之事庶盛際之親逢儻少答於鴻私
自願歸於農畝